

P R Æ F A T I O.

modestia, qua ut erga me utantur alii, in votis habeo. *Tertio*, veritatis æque ac reverentiæ erga τὰ λόγια τῆ Θεῆ, suprema mihi lex fuit, ad quam omnia, cum mea, tum aliena, exigenda esse censui, nec vel autoritate dicentium, vel novitatis gratia, vel partium studio, vel animi prave affecti impetu, a veri rectique tramite abripi ac dimoveri me passus, ita judicavi de singulis, ut ipsa rerum fert indoles ac natura. Non itaque, quam inaudita & nova sit, cui inhærerem sententia, sed quam vera, solida, & sobria, pensi habui, & ubi non satisfacerent aliorum rationes, meoque ingenio standum mihi esset, quod subinde factum fuisse non inficior, opinionis meæ causas & momenta protuli, easque proborum doctorumque virorum iudicio submisi: dictatoriam illam procul habens arrogantiam, qua omnibus ingenii sui figmenta, velut ex tripode dicta, & ἀνυπεύθυνα, pro auctoritate obtrudere nonnulli consueverunt. Sed nec mihi adeo sum suffenus, ut me Lectorum omnium laturum esse suffragium